

Was der heilige Prophet Esaias am 1. klagt wegen der geringen Zahl der Gläubigen/ da erspricht: Was noch übrig ist von der Tochter Zion/ ist wie ein Häuflein im Weinberge/ wie eine Nachthütte in den Kürbisgarten/ wie eine verheerete Stadt/ wenn vns der HERR nicht ein wenig ließe überbleiben/ so wären wir gleich wie Sodom vnd Gomorra: Eben dasselbe klaget dieser Psalm auch: Hilff HERR/ die Heiligen haben abgenommen/ 2c. So möchten wir warlich zu vnser Zeit auch wol klagen/ wo wir vns hinwenden vnd kehren/ da ist alles verderbet in allen Ständen/ vnd nimpt der Antichristliche Hauffe sehr überhand/ als des Teuffels Unkraut/ welches den guten Weizen vnterdrucket.

Darüber klaget David erstlich/ vnd beschreibet die Heiligen Gottes vnd nennet sie Gläubige.

II. Beschreibet er den falschen Gottesdienst/ Einer redet mit dem andern vnnütze Dinge.

III. Die Kennzeichen des Antichrists/ Heuchelen/ stolze Zunge/ die da sagen/ Vnser Zunge sol überhand haben.

IV. Führet er Gott den Herrn ein/ als eine redende Person/ der verheisset seiner Kirchen Erlösung/ weil die Elenden seuffzen.

V. Rühmet er das Wort Gottes/ wegen seiner Lauterkeit vnd Reinigkeit/ das Wort des Herrn ist lauter/ doch daß es vnter dem Creutz recht erkant/ gelernet/ vnd bekant wird.

VI. Bittet er vmb Schutz der Kirchen/ daß sie möge für dem antichristlichen Unkraut bewaret werden. Weil nu David eine Figur vnd Bilde der Kirchen ist/ bittet er nicht allem wider die falschen Propheten des alten Testaments/ sondern vornehmlich wider den Antichrist des neuen Testaments/ weil derselbe dem Reich Christi ganz zu wider ist/ vnd also sollen alle solche Psalmen verstanden werden. Die ersten drey Stück wollen wir für dißmal handeln.

I.

Beschreibung der gläubigen vnd heiligen Kinder Gottes/ vnd ihrer Heiligkeit/ Item/ Was wahre Christen seyn/ vnd ein Christlich Leben heiße.

Hilff HERR/ die Heiligen haben abgenommen/ vnd der Gläubigen ist wenig vnter den Menschenkindern: Das ist: Ach HERR/ weil alle Gottesfurcht/ Glaube vnd Liebe vnter den Menschen verlisset/ so errettemich/ vnd hilf mir/ daß ich den Glauben vnd gut Gewissen bis ans Ende bewahren möge.

Es ist aber allhier zu mercken die Beschreibung der Heiligen/ daß dieselben sind die Gläubigen/ vnd die Gläubigen sind die Heiligen/ darumb daß sie durch Christum geheiligt/ gereinigt vnd gerecht seyn/ auch in Christo leben/ vnd mit Früchten der Gerechtigkeit erfüllet seyn/ zu Lob vnd Priesß Gottes. Darumb ist's nichts daß du sagest/ Ich glaube/ ich glaube/ hast den Glauben im Munde/ du mußt auch mit Heiligkeit des Lebens beweisen/ Ein Gläubiger ist darumb durch Christum geheiligt/ daß er

heilig leben sol/ vnd Gott dienen in Heiligkeit vnd Gerechtigkeit/ der Herr hat ihm ein heiliges Volk bereitet/ das fleißig war zu guten Wercken/ Er hats beruffen zur Heiligung/ vnd nicht zur Unreinigkeit.

Vnd lernen allhie erstlich/ wie der heilige Geist seuffzet vnd klaget über den grossen Unglauben/ Unbusfertigkeit vñ gottlos Wesen der Welt. Diese Klage ist bald angangen in der ersten Welt: Die Menschen wollen sich meine Geist nicht mehr straffen lassen/ denn sie sind Fleisch. Mit diesen Worten beschreibet vns der liebe GOTT zweyerley Führer vnd Leiter/ oder duces vitæ humanæ: Seinen Geist/ vnd das Fleisch/ der Geist Gottes wircket im Menschen ein geistlich/ himlisches/ heiliges vnd göttliches Leben/ vnd treibet den Menschen zu allem was Göttlich ist/ er feyret nicht/ er ruhet nicht/ sondern treibet/ beweget/ reizet/ ruffet immerdar/ äußerlich durchs Wort Gottes/ innerlich durchs Gewissen/ Denn das sind die zwey Mittel des h. Geistes/ das Wort Gottes vnd des Menschen Gewissen/ dadurch er alle Menschen erinert/ was Göttlich/ himlich vnd gut ist. Folget nuder Mensch der äußerlichen vnd innerlichen Stimme des h. Geistes/ vnd lasset in ihm wircken den Glauben/ die Liebe/ die Hoffnung/ die Gedult/ Sanfftmüt/ Demut/ Andacht/ Gottesfurcht/ Gebet/ Lob vnd Priesß Gottes/ Beständigkeit/ Gerechtigkeit/ Wahrheit/ Barmherzigkeit/ Friedfertigkeit: Jezo heisset er ein geistlicher/ himlicher/ göttlicher/ heiliger Mensch/ vnd hat seinen Namen von dem h. Geist/ der ihn heiligt/ der in ihm wohnet/ lebet vnd wircket/ er heisset ein Gesalbter des Herrn/ darumb daß er vom heiligen Geist gesalbet ist/ er heisset ein wahrer Christ/ darumb daß er mit dem Geist Christi gesalbet ist/ vnd daß Christus in ihm wohnet/ vnd lebet durch den Glauben/ vnd ist ein solcher Mensch/ in dem das Reich Gottes ist/ das ist das Reich der Gnaden/ welches ist die Gerechtigkeit/ Friede vnd Friede im heiligen Geist: Also ist ein solcher Heiliger im Reich Gottes/ vnd das Reich Gottes in ihm/ Er ist in Christo/ vnd Christus in ihm/ Er ist im heiligen Geist/ vnd der heilige Geist in ihm/ Er ist in Gott/ vnd Gott in ihm. Vnd wenn er diese irdische Hütten ablegt/ im Glauben/ so kömpt er in der Auferstehung ins Reich der Herrlichkeit/ darin die Verklärung des ganzen Menschen geschehen wird/ da in ihm die Gaben des Geistes werden vollkommen/ vnd offenbar werden/ als ein geistlicher himlicher Schmuck/ Glanz/ Licht/ Klarheit/ dadenn auch Christus mit seiner vollkommenen Gerechtigkeit/ Heiligkeit vnd Klarheit in ihm wohnen vnd leuchten wird/ denn das wird der Gläubigen Verklärung seyn/ denn werden sie im Reich der Herrlichkeit seyn/ vnd das Reich der Herrlichkeit in ihnen/ denn werden sie seyn im Vater/ vnd der Vater in ihnen/ sie werden seyn im Sohn/ vñ der Sohn in ihnen/ wie Joh. 17. stehet/ sie werden seyn im heiligen Geist/ vñ der heilige Geist in ihnen/ vnd dasselben nicht mehr vn sichtbarer Weise im Glauben/ wie hie in dieser Welt/ sondern offenbar sichtbarer Weise/ verklärter Weise/ wie S. Paulus sagt: Vnser Leben ist verborgen